

【長年菜】徐姿華原作

佢做細人仔該下，阿婆身體還當健，佢異煞猛，會在屋脣、屋背改菜園來種菜，照等節氣來種青菜：蔥仔、蒜仔、吊菜仔、薤菜、快菜、角菜、紅菜、白菜、菜瓜、苦瓜項項有，平常時三餐个青菜就對這來。冬下頭，阿婆就會種芥菜同蘿蔔仔，青荷荷个芥菜割下來做得萋萋煮來食，也做得滷鹽加工做鹹菜、做覆菜，抑係晒鹹菜乾；阿婆總會留幾頭芥菜過年好用。愛入年假哩，就同蘿蔔仔擲轉來蒸蘿蔔版、同芥菜割轉來炆長年菜。

逐年三十暗晡食團圓飯个時節，桌項定著有炆筍乾同長年菜，炆好个筍乾滲黃¹滲黃，摻等共下炆到酪酪个蘿蔔仔同鹹菜，香香脆脆个筍乾合等²酸丟³酸丟个鹹菜同蘿蔔仔，好食到舌嫲硬硬⁴會吞落去。長年菜也炆到酪酪香香，食起來還有一息息苦甘苦甘个味緒，阿姆總係用爌好頭牲个肥湯來炆筍乾同長年菜，筍乾摻長年菜較澀愛油氣，用肥湯來炆盡堵好。該兩鑊大嫲鑊个筍乾同長年菜，輒常

對三十暗晡食到初五出年假，暖了暖、餐餐都上桌。

細人時節个佢當惱食長年菜，嫌佢菜色黃黃又苦篤苦篤，一息都毋錫人食。領膽⁵个佢識問吾姆講：「該項菜恁毋好食，做麼个愛煮恁大鑊？又無人愛食。」吾姆應佢講：「細人仔毋好亂講話！這係『長年菜』，偲過年生成⁶愛食『長年菜』，屋下人正會長長久久、長命百歲。『長年菜』有人講係本成農業社會，農家个長年仔⁷會趕收好翻耕禾過後，同頭家牯地來種芥菜，收成个時節堵好係冬下，賣分人家加賺一息錢好過年。因致係長年歸年做工，又加額種个菜，就安做『長年菜』，這『長年菜』也象徵長壽、苦盡甘來，過年時節家家屋屋做下會食這『長年菜』，希望有好長命百歲。」聽著阿姆恁樣講，高不將佢正刻耐仔⁸食這長年菜。

到較大吔，佢去到外背讀書、食頭路，逐年放寒假轉屋下過年，團圓飯桌項共樣有炆到油光油光、滲黃滲黃个筍乾同香香酪酪个長年菜，怕係佢既經知得這菜代表个意思，還有回鄉遊子个心情，傍等爺哀个笑容，團圓飯个筍乾食來特別脆、長年菜也少忒苦味，正伸甘味定定。

¹ 滲黃：音 nem' vong'；金黃色。

² 合等：音 gag' den'；搭配著。

³ 酸丟：音 son' diu'；酸酸的。

⁴ 硬硬：音 ngiang ngiang；幾乎。

⁵ 領膽：音 ngam' dam'；不知天高地厚。

⁶ 生成：音 sang' sang'；本來如此。

⁷ 長年仔：音 cong' ngien' e'；長工。

⁸ 刻耐仔：音 kad' ngai e'；勉強。

【 戇狗想食豬肝骨⁹ 】張美容原作

前幾日去市場割豬肉，豬砵个頭家看佢買買拏盡多樣，就當阿莎力割一坭豬肝送佢。當久毋識食豬肝吔！佢暢樂樂仔¹⁰還等豬肝轉到屋下，俵仔一看著就講：「豬肝係豬仔解毒个器官，豬仔食个飼料可能有生長激素、瘦肉精，最好毋好食。」心白續等又講：「有年紀个人吔，腹內做毋得食忒多。」你一句、佢一句，講到佢毋知愛摺這坭豬肝忒好抑係煮來食好。

記得佢細人仔時節，大家毋係日日有肉氣¹¹好食，吾姆長下會準備一、兩樣私傢菜分吾婆摺吾公食，毋係豬肝湯，就係碎肉湯。第一擺看著桌脣个豬肝湯，一坭一坭个豬肝還錫人哪！佢摺老弟、老妹毋知頭天，相爭愛挾來食，吾姆黏時¹²咄佢兜講：「恁無規矩，戇狗想食豬肝骨得似！」細人仔平時想愛食豬肝，就像戇狗想食豬肝骨樣仔。吾婆惜孫，會挾幾坭仔分孫仔、孫女食，佢最惜佢，總係偷偷仔多挾幾坭仔在吾碗肚。對該下開始，豬肝在吾心肝肚係最

高貴个食物。

無想著以後，「戇狗想食豬肝骨」這句話，長下響在吾耳公脣。因為從細吾婆就惜佢、縱佢，愛麼个就有麼个，毋識失望過。到吾婆過身後，就無恁好空哩，尤其佢座大¹³，下頭有五個老弟、老妹目金金仔看等，吾姆對佢个要求，總係用「戇狗想食豬肝骨」來應佢。毋好講「豬肝骨」這種無个東西，就連豬肝乜高高在上，閒時閒節也難食著，故所吾姆應佢這句話，代表佢係戇想¹⁴啦！毋過，佢逐擺還係「鴨嫲嘴罔吮」，希望有一、兩擺做得合意。唉！該願豬肝¹⁵个日仔啊！

頭擺無恁豐湧个年代，豬肝做得補血，係盡有營養个食物，這下个人山珍海味食多，營養過多，無麼个人愛食吔！自然豬肝个價錢就跔等便宜，幾十銀就買一大坭，還長下分店頭家拿來搭秤頭¹⁶用。佢想就算有「豬肝骨」，好命个狗仔也可能無愛食哩！看等桌頂个豬肝，想起頭擺个種種，煮來食好啦，順續摺佢對吾婆个思念共下吞落肚。

⁹ 戇狗想食豬肝骨：音 ngong gieu` xiong` siid zu` gon` gud`；比喻痴心妄想。

¹⁰ 暢樂樂仔：音 tiong lag lag e`；很高興。

¹¹ 肉氣：音 ngiug` hi；肉類。

¹² 黏時：音 ngiam` sii`；立刻。

¹³ 座大：音 co tai；排行較年長。「座」指所居、所處的位置。

¹⁴ 戇想：音 ngong xiong`；妄想。

¹⁵ 願豬肝：音 ngien zu` gon`；對豬肝垂涎三尺。

¹⁶ 搭秤頭：音 dab` ciin teu`；陪襯、附贈。

【過年】李秉璋原作

過年吔！過年吔哦！細人仔在該暢過年，大人嗰在該愁過年。記得做細人仔个時節，過年前，阿姆就當無閒。愛糴¹⁷糯米、粘米，蒸甜粄、蘿蔔粄、紅粄、豬籠粄。連僮乜愛去揸穀去精米¹⁸。摶歸隻米缸裝到淦淦，還愛貼一張「滿」个春聯。阿姆一有閒就愛擣草結¹⁹，摶灶前堆淦草結還過摶燥樵疊到高高。到時愛蒸粄仔正有耐火个燥樵好燒。細人仔人乜無好閒，愛搨拚掃，擎一支長棍仔緝一抓禾桿做一支長長个掃把摶屋頂个蜷崎絲掃掃下來，無就摶被骨、榻榻米搬到禾埕中央晒日頭，摶屋下裡肚做一擺大拚掃。

毋過分僮頸根伸長長在該等个，係做紅粄摶豬籠粄。屋下後背有磨石還過大粒个舂臼，到時會有當多人揸浸好个米來這位用磨石磨粄仔。看大人企在該，腳骨一前一後，企好勢，雙手搭等一支鐵柄摶磨石搥到挨挨轉，另外一儕人就像係功夫高手，用大湯匙摶摶水个米，捉準時機，閃開鐵柄，倒落去磨石面頂該隻漏米空。這時

節就會看著米漿對磨石甯流下來。另外有兜人摶煮熟个紅豆仔無就炒好个番豆，在該用大支舂槌舂粄心，就像係大力士樣仔，摶舂槌擎到高高，大力舂落去，歸大陣仔人在該無閒泊杈，實在當鬧熱。

續下來，摶歸袋仔个米漿用石頭砵做粄粹了後，打早四點零就愛䟽起來个粄仔，先拿一坵粄仔蒸分佢熟做粄嫲，个落砵好个粄粹裡肚，摶一息大紅²⁰，摶粄仔个到一團軟軟靱靱，就做得捏起來包心做紅粄、豬籠粄吔。做好个粄仔放在粄葉樹²¹个樹葉仔無就构薑葉面頂，用粄印²²摶龜仔印上去，過後用剪刀摶葉仔修剪分佢靚，就做得放落大鑊蒸吔。阿姆會在灶頭脣點一支香測時間²³，等該支香燒過忒，就有分人看著都流口涎水个粄仔好食囉！

年三十該日，開甜粄²⁴砵神桌，神桌面頂還愛放生仁糖、年柑還過插春花。灶頭面前乜愛放一盤甜个食品拜灶公爺，希望灶公爺食甜甜上天頂會摶僮兜講好話。這日仔當多出外个人著到萋萋，轉來屋下團圓，這時節莊下滿哪仔都係人。半夜十一點一過，就聽著紙炮仔聲，就係過年吔。初一打早歸屋下个人就帶等去拜媽祖婆、恩主公、拜伯公，去親戚該行春，大家心頭歡喜來過年！

¹⁷ 糴：音 tag；買。買糧食用「糴」，賣糧食用「糶」，如糶米糶穀。

¹⁸ 精米：音 jin' mi；碾米，用家庭號碾米機自行在家碾米。

¹⁹ 擣草結：音 ton' co' gied；將稻草或蔗葉來回折成數折，再用數根稻草將其綁成一小捆。昔為農家煮飯菜必用的柴火。

²⁰ 大紅：音 tai fung；食用級紅色色素。

²¹ 粄葉樹：音 ban' iab su；黃槿樹，因常用做粄的襯底，所以又稱粄葉樹。

²² 粄印：音 ban' in；用來打印粄的模具。

²³ 測時間：音 zed' sii' gien；計算、控制時間。

²⁴ 開甜粄：音 koi' tiam' ban；將蒸籠內的年糕用菜刀將其分切成數塊。

【阿姆个話】江秀鳳原作

還細个時節，佢算係當番綻个細妹人，大人講麼个「細人仔有耳公無嘴」、「用手指指月光，會分月光割耳公……」這兜話在吾心肝肚，單淨係大人騙細人仔个把戲。

講著吾姆，實在有罇好性體，毋會唸唸唸唸、毋會生話、乜毋會講人个長短，佢總係摺愛講个話寫在心肝肚。自佢知人我起勢，阿姆單淨曉得𠵼麵粉做雞卵糕、做「胖」²⁵分佢食，恁樣摺佢畜到大。佢摺愛同佢講个話包到紅豆仔或者係芋仔、番豆裡肚。「紅豆仔」係愛同佢交代，出去外背萬項事情愛細義，過車路愛看紅綠燈；「芋仔」愛同佢吩咐，今晡日會落雨，愛記得帶遮仔；「番豆」代表佢這擺考試考毋好，阿姆暗示佢愛加一息時間讀書，吸收有用个知識做肥底，有營養个土地，正會生出一粒一粒圓滿飽米个番豆仁。

吾姆做个「胖」好食又撈腹，擺到店項，分人看到流口涎。行落店肚鼻著香醇醇仔个味緒，肚屎就會咕嚕咕嚕緊叫，買「胖」止枵，做點心乜異合味。「削胖」²⁶一條長長長，做得分歸屋下人食朝；肉𦍋²⁷「胖」鹹香啊鹹香，外皮酥酥內肚帶一息仔韌，食著會尋尾

還想愛食加一坭。

還記得八月半進前，阿姆做月光餅做到歸暗晡無睡目，天光無睡又還愛煮飯洗衫順續掌店，佢看阿姆無閒泊杈挨挨轉，無時間好管佢，就摺朋友出去寮到毋知好轉屋。天會光个時節，佢躡²⁸腳尾毋敢開電火，偷偷仔踏入門，拓拓風看著阿姆坐到店中央，兩隻目珠框烏烏，就像係掛一副烏目鏡樣仔，目珠無神無神，親像強強會烏忒个電火珠仔。阿姆看著佢轉來，跔等問佢去哪位，佢老實承認自家摺朋友去電動間打電動，打到毋知時間，搞到恁暗分阿姆愁慮當失禮。該暗晡，阿姆同平常共樣無罵佢，佢用雙手擋目珠，看起來真恁个樣仔，喊佢遽遽去睡目，等一下還愛去學校讀書。

該日下課轉來，阿姆做一粒包番薯个「胖」拿分佢食，佢講：「恩屋下雖然窮苦，手腳又少，乜愛像番薯共樣恁有志氣，擲到哪位都有法度企起來，認真讀書正有出籐²⁹，毋好分人看毋起。你今晡日愛記得這粒番薯「胖」裡肚个意義，你既經大咗，自家愛曉得想，毋好過分佢愁慮。」

自從該擺過後，佢就毋識再食過包番薯个「胖」，毋過，佢永久毋敢毋記得阿姆个訓示。阿姆个話總係園到「胖」裡肚，一句一句分分明明；一字一字清清楚楚，聲聲句句就喊佢愛做一個有用个人。

²⁵ 胖：音 pang`；外來語パン，麵包。

²⁶ 削胖：音 xioḡ pang`；外來語しよくぱん，土司麵包。

²⁷ 肉𦍋：音 ngiug` fu`；肉鬆。

²⁸ 躡：音 ne；用力提起腳跟只靠腳尖著地。

²⁹ 出籐：音 cud` tod`；喻出人頭地。

【 杧仔樹 】張瑞玲原作

吾田項種有一頭杧仔樹，恬恬企在牆頭下，因為無時間好知理³⁰佢，就放佢在該天生天養。毋過，佢也真增志³¹，不時都看得著佢開花、打子，加減有兜仔收成好分佢罔食。

有一日，一個打林種果子个朋友來坐寮，睺著³²這頭杧仔，大咻一聲：「你實在真打爽人个東西！無採人个杧仔！放佢在該也無去知理佢！」聽佢講~~子~~地，佢頭那皮緊爪，毋知愛應佢麼个正好。

就恁樣，本來係來坐寮个朋友，這下嘎變做吾个杧仔先生咧。佢定定仔教，佢慢慢仔學。學歸下晝仔，正知杧仔樹毋係放佢緊綻新葉就會開花；愛定期修剪、放肥料。剪極也毋係儘採、濫糝剪：忒幼个毋會打，愛剪忒；衝心个若放佢生到忒高，另擺異艱辛摘，毋好留……。單淨留該生往出、平平个極就好，又還講：「一極留一粒就好，毋好毋盼得，係無另擺打个子，總下細細粒仔又壞食。」又教佢哪央時愛刪³³花苞、果子幾大該下愛刪粒、生來正當个杧仔子愛留等、歪歪孬孬个愛刪忒……。佢聽到嘴擘擘仔、頭暈腦疼，

除忒領頭以外，麼个話都應毋出。無想著，一頭細細頭个杧仔樹，有恁多學問哪！

朋友愛離開進前，還交代：「佢今晡日教你剪極剪好哩哟，五個半月了後，佢愛來食若杧仔哦！」為著無想愛在朋友面前落櫃³⁴，這下，這頭杧仔嘎變到佢下班了後个頭項事頭咧！逐日都愛去田項巡佢一下、遶佢一下。毋係剪刀擎等剪極，無就淋水、落肥料。有一日下晝頭，行到田項，遠遠看著歸樹白蓬蓬，算算啊，怕有歸百蕊花哦！

一日等過一日，總算等到花啟忒，結著一粒比手指尾頭截較細个杧仔子；又等啊等，等到杧仔子較大粒咧，恁起朋友吩咐个：「若係兩、三粒生共下，愛刪忒伸一粒就好！」毋過，三粒平大平大，緊看緊毋盼得，刪忒實在打爽，留等好啦！

日見日，杧仔子一日一日看等佢大，當初時毋聽話留等个，這下嘎極共下³⁵，極著个所在靠著³⁶，總下食毋得，三粒都愛摘忒。有這擺个教訓，包尾吉大个，佢就乖乖仔聽人講，一極留一粒就好。

跔等，有好大粒哩哟，就買網仔同袋仔同佢包起來。看著歸樹包到累累墜墜³⁷，吾心肝肚想：「等兩個月過後，朋友來驗收成果，應該毋會落櫃正著啦！」

³⁰ 知理：音 zii' li'；養護整理。

³¹ 增志：音 zen zii；積極進取之意。

³² 睺著：音 lai' do'；不經意的看見。

³³ 刪：音 xien'；修整枝條。

³⁴ 落櫃：音 lau kui；出糗、出洋相。

³⁵ 極共下：音 kid kiung ha；擠在一起。

³⁶ 靠著：音 ko do'；挨近而磨擦到。

³⁷ 累累墜墜：音 lui' lui' cui cui；形容果實累累成串垂下的樣子。

【一坵靚靚个田】彭瑞珠原作

春分過後，在燒暖个日頭下，看一坵靚靚个田，心肝肚會有幸福个感覺。因為春天來咗，因為目珠前有闊闊个風景、清爽个色彩，因為想像著這兜秧仔會緊來緊高、緊來緊砸礮，另擺³⁸還會用金黃色个禾串來塞湊這坵田，就試著幸福。蒔田、割禾、委秧仔，這兜田事，還會在人个腦殼裡肚緊問「你有做過無？你有看過無？」

你有看過人委秧仔³⁹無？委秧仔前愛先沾穀種⁴⁰，經過幾下日夜个浸水、換水，水濾忒過後還愛等兩日仔分佢暴芽，正做得摺穀種委到秧仔田裡肚。秧仔田个泥面平平、泥肉幼幼、水分足足，就像係一坵好食个甜版共樣，穀種在這位大，應該也會感覺著幸福。等兩禮拜仔，秧仔大到比拳頭嫻較高咗，就做得摺佢種到田坵裡肚哩。

佢有看過七十零歲个阿公，打早在田坵裡肚細心細意个抹田⁴¹、委秧仔个身影。該略略仔彎身、穀穀⁴²个手花，當好看。該定定仔委過去、勻勻仔委過來，認真做事个態度，佢當記得。還過，該

坵平高平大、嫩習習、靚靚个秧仔田，盡得人惜。

雖然人講「勤勞身體好，懶尸催人老」。毋過，七十零歲个阿公還愛自家去委秧仔，敢毋會忒冤枉？佢講：「阿公，仰無愛喊後生人做？」阿公有兜仔沙鼻个應佢講：「後生人，哪曉得！」該央時佢搞毋清楚，阿公係無奈何做个？抑係好做？到這下佢知哩，愛照顧好一坵田，愛異多个經驗：照顧秧仔大个一個月、照顧禾仔大个三、四個月，正經愛有做過个人，正會曉得。

人講「敬禾得穀，敬老得福」。青油油个秧仔，愛經過異多耐心个照顧，正會砸礮；豐收个笑容，愛經過異多煞猛个打拚，正會得著。每一粒，在偲俚飯碗裡肚个飯粒，都係經過當多人个辛苦正會有个。人，乜像該兜秧仔共樣，愛經過爺哀異多个照顧摺辛苦，正會大、正會砸礮。

知得別人个辛苦，愛曉得感恩。曉得感恩个人，係有福氣个人，因為厥心肝裡肚，有一坵靚靚个心田。

³⁸ 另擺：音 nang bai`；下次。

³⁹ 委秧仔：音 ve iong' e`；撒穀種。

⁴⁰ 沾穀種：音 dem' gug` zung`；將穀種置於竹籬中，放入水中浸泡，使其發芽。

⁴¹ 抹田：音 mad` tien`；此指將種苗田的田土表面弄平。

⁴² 穀穀：音 gug` gug`；緊密順暢。

【阿公个傢啦伙事】謝惠如原作

逐朝晨在二樓搓牙齒洗面後，赴時赴刻愛去學校讀書。落來飯廳食朝時，就會堵著去田坵做一齣事⁴³轉來食朝个阿公，添著一碗硬飯傍豆腐乳、番豆，係無就將昨暗晡食伸个菜暖燒來食。佢講食饅頭同粥毋會止飢，屙一堆屎就肚飢咧，做事个耕田人，愛食飯正會飽，肚屎飽正做有事。

一臺 26 鏈个自行車，後輪頂高个載貨鐵架仔特別大，裝菜个大竹籃仔有三尺長、兩尺闊、尺半深，放在車仔頂高用籬索捆紮，載成百斤菜無問題。阿公講：「後生時對屏東騎這臺鐵馬仔載菜去高雄賣，打早一點零出發，三點空仔⁴⁴就到鳳山賊仔市⁴⁵。」一頂笠、一副手袖仔、一條蒙面个大手帕、一雙靴筒、褲頭項攝一條細手帕，車頭項挽一隻農藥行送个塑膠家濟仔，放茶同做事愛用著个東西。

屋下田坵四圍个隔壁鄰舍，全部都種檳榔樹，做得賣異多錢，省工又好管理，阿公聽著，乜踅等種菁仔樹。田坵肚有做一間工寮，

逐年六、七月份菁仔生產期，價市好當會分賊仔偷割，阿公同阿婆就會去工寮睡，順續仔掌菁仔，寮仔肚係有點電火，就證明有人在，賊仔就會驚毋敢來偷割。

菁園个草靚時，阿公會用胸前揸食汽油个自動打草機，撈草仔割到亮光⁴⁶，看起來當鬆爽。阿公割草時，頭那蒙大手帕，頸根以下著圍身裙，驚彈起來个草屑仔打著目珠，面項戴防護目鏡，伸著地面項个割草鐵棍，底座有一個圓形个鐵盤，做得安刀片割草，乜做得安牛筋抑係鋼線來修草⁴⁷仔。夏秋時雨水多，驚田坵肚肥份高个泥油流忒，就放佢生草保護田場，阿公講會發風搓个時節，愛同草仔和平相處，田力正做得保持，落雨後愛將田缺挖開來將雨水排忒，田坵正毋會分水浸到凝塘⁴⁸。

寮仔脣个泵浦⁴⁹間係放抽水个摩打⁵⁰，還有一組電動个洩農藥機，一年透冬檳榔樹愛洩三到五擺農藥，係無芥殼蟲同紅蜘蛛會將樹身蜒到毋會開花。佢不時會看著佢去農會買台肥 43 號肥料，用揸在肚屎前个塑膠放肥料桶，一頭一頭仔去委，聽講放 43 號肥料，菁仔剖白肉時，會有較多个白肉菁，做得賣較多錢。

耕田个阿公傢啦伙事特別多，屋下同田坵仔都看得著。

⁴³ 一齣事：音 id` cud` se；工作一段落。

⁴⁴ 三點空仔：音 sam` diam` kung e`；三點多。

⁴⁵ 賊仔市：音 ced e` qi`；文中指貨類多又便宜，搶買人潮很多的批發大市場。

⁴⁶ 亮光：音 lang gong`；平整光亮。

⁴⁷ 修草：音 xiu` co`；整修草。

⁴⁸ 凝塘：音 kien` tong`；泥土浸泡水太久會變成爛泥巴。

⁴⁹ 泵浦：音 bong pu`；一種用來移動液體、氣體或特殊流體介質的裝置。

⁵⁰ 摩打：音 mo` da`；電動機，又稱為馬達、摩打或電動馬達。

【 偌感恩 】 劉玉蕉原作

打早，目珠擘啊開，就看著日光，柔柔仔晟到窗門來咧，遠遠近近个鳥仔聲，嚟嚟啾啾，喊偌好遽遽跣床。伸下硬鉸个腰骨，一管清淨个空氣，走對鼻公入，鑽到還懣神懣神个頭那肚，一下仔，歸個人就精神起來咧！眠床軟軟，被骨燒燒，想加搵下眠床，噯分窗門脣該頭牛眼樹錫著，厥个樹杷垂到窗門邊，探頭看偌，壯旺个樹身，撐等一樹榮榮个樹葉，樹頂高這下當在該開花打子，錫來一陣飛上飛下採花蜜个糖蜂仔，細細个身影，在花蕊間無閒絮翼⁵¹，日頭下，佢這兜个翼胛帶光，像星仔，又像火焰蟲，做个事頭，係老古時代到今个傳承，原來所有个動物做下共樣，無私心，生命个延續正長久。

行到屋背，阿婆在該拉水管淋花，閉出來个水，在日頭下，金皙皙仔，像鑽石，時間停在這，偌噯目花花咧。看哪！頭臥臥仔个花葉像嬰兒仔，目金金仔望等阿姆个乳水，乳水有足，嬰兒仔就笑微微仔，日見日大，植物也共樣，花身旺，開个花就又大又靚，佢用花香，用多彩个色目，妝點偌人个世界，厥个靚使致人好心情。

⁵¹ 絮翼：音 xi id；整飭翅膀羽毛。

毋過你會講，有花開就有花謝，係呀！偌人會讚美開花時節个靚，噯毋記得欣賞花謝落泥个自然。阿婆輒輒講：愛讚美別人个成就，欣賞每一個生命个過程。偌想這應該係佢照顧花草悟著个人生觀哦！

牙齒搓好，面洗淨，桌頂既經放等燒烱燒烱个早朝，等偌來食咧。感謝阿爸同阿姆个生養、教育，因為佢兜个煞猛打拚，偌這兜正有無愁食著个生活。上學、放學，路頭路尾該指揮个身影，係使人尊敬个義警、愛心媽媽，佢兜細心細意守顧每一個過大路、行路人个安全，感謝佢兜个辛苦，無私心个付出，偌這兜正做得逐日都歡歡喜喜、平平安安來學校、轉屋下。

學校肚，感謝認真教學个先生，佢兜用雞嫲孵雞子樣仔个耐心，隨時叮嚀、提點偌這兜，做人做事个道理，解答偌兜每一個學習堵著个问题。感謝像兄弟姊妹恁親个同學，無棄嫌也無計較，大家共下學習，共下搞寮，共下分享每一項歡喜同愠悴个事情。

感謝天，感謝地，感謝天地賜分偌人有唧唧个蟲聲，汨汨⁵²个流水，呼呼个風，滴滴溶溶个雨水，天晴日頭烈，花花草草綻筍又打子。感謝四季个運轉有定時，感謝有情个世界，感謝天地間所有个萬物。

⁵² 汨汨：音 gug gug；流水聲。